



Baselgia evangelica refurmada
da la Svizra

Baselgia evangelica refurmada da la Svizra BERS

Nova constituziun

Approvà da la radunanza da delegadas e delegads da la
Federaziun da las baselgias evangelicas da la Svizra ils 18 da december 2018.
Entra en vigur per il 1. da schaner 2020.

Cuntgen

Preambel

I. Premissas

- § 1 Cuminanza da baselgias
- § 2 Incumbensa
- § 3 Origin e testimonianza
- § 4 Unitad en varietad
- § 5 Esser baselgia ensemen

II. Incumbensas

- § 6 Incumbensas internas
- § 7 Contacts externs
- § 8 Ovras ecclesiasticas ed organisaziuns da la missiun

III. Disposiziuns generalas

- § 9 Sez ed organs
- § 10 Scumond da discriminaziun
- § 11 Egalitad
- § 12 Lingua

IV. Commembranza

- § 13 Cumposiziun
- § 14 Admissiun
- § 15 Sortida
- § 16 Exclusiun

V. Direcziun da la BERS

- § 17 Direcziun da la BERS sin trais nivels

A. Sinoda

- § 18 Disposiziuns fundamentalas
- § 19 Cumposiziun
- § 20 Presidi da la sinoda
- § 21 Cumpetenzas
- § 22 Dretg da vuschar
- § 23 Cumissiun da gestiun
- § 24 Cumissiun da nominaziun
- § 25 Conferenzas

B. Cussegl

- § 26 Disposiziuns fundamentalas
- § 27 Cumposiziun
- § 28 Cumpetenzas
- § 29 Decisiun

C. Presidenta u president da la BERS

- § 30 Disposiziuns fundamentalas
- § 31 Cumpetenzas

D. Gremis consultativs

- § 32 Cumissiuns strategicas
- § 33 Conferenza dals presidis da las baselgias

E. Secretariat

- § 34 Status ed organisaziun

F. Revisurat

- § 35 Incumbensa

VI. Associaziun

- § 36 Baselgias e cuminanzas associadas

VII. Finanzas

- § 37 Principis
- § 38 Contribuziuns da las commembras
- § 39 Contribuziuns extraordinarias

VIII. Revisiun da la constituziun

- § 40 Proceder
- § 41 Schliaziun

IX. Disposiziuns finalas

- § 42 Entrada en vigur
- § 43 Disposiziuns transitoricas e finalas

Agiunta
Las baselgias commembras da la BERS

Preambel

La Baselgia evangelica refurmada da la Svizra (BERS) dat perditga da Dieu sco il creader, da Jesus Cristus sco il salvader e ses unic chau, e dal Spiert songt, il consolader e gidanter.

Ella renconuscha en las scrittiras dal Vegl e dal Nov Testament la testimonianza da la revelaziun divina.

Ella dat perditga, che nus essan salvads tras grazia e giustifitgads tras la cretta.

I. Premissas

§ 1 Cuminanza da baselgias

La Baselgia evangelica-refurmada da la Svizra (BERS) è la cuminanza da las baselgias evangelicas-refurmadas ed ulteriuras baselgias protestantas en Svizra.

§ 2 Incumbensa

- ¹ La BERS annunzia cun pled e fatg l'evangeli da Jesus Cristus.
- ² Ella annunzia quel cun pled e sacrament, diaconia e pastoraziun, educaziun e furmaziun.
- ³ Ella raduna umans per uraziun e cult divin.
- ⁴ Ella dat perditga ed envida da suandar Cristus.
- ⁵ Ella surpiglia sia incumbensa sociala e s'engascha per giusta, pasch e mantegniment da la creaziun.
- ⁶ Ella contribuescha a la pasch tranter las religiuns.
- ⁷ Ella s'engascha per chapientscha e respect tranter ils aderents da las differentas cuminanzas religiusas e per il mantegniment da la libertad religiusa.

- ⁸ Ella envida tut ils umans, independent da lur derivanza sociala u culturala, ad ina cuminanza reconciliada.

§ 3 Origin e testimonianza

- ¹ La BERS parta cun l'entira cristianadad la cretta formulada en las cardientschas da la baselgia veglia.
- ² Ella stat sin il fundament da la refurmaziun e respecta las cardientschas refurmatoricas. Ella maina vinavant la refurmaziun.
- ³ Ella exprima la cretta cristiana en maniera actuala.

§ 4 Unitad en varietad

- ¹ La BERS viva sin ils trais nivels: plaiv locala, baselgia commembra e cuminanza da baselgias.
- ² Ella fa part a l'ina baselgia songta, universal ed apostolica.
- ³ Ella collavura cun autras baselgias e cuminanzas cristianas. Ensemen cun quellas s'engascha ella per ina testimonianza cristiana autentica en la societad.
- ⁴ Ella collia sasezza e sias baselgias commembras cun la cristianadad mundiala, tranter auter sco commembra da la Cuminanza da baselgias evangelicas en Europa, la Conferenza da baselgias europeanass, la Communitad mundiala da baselgias refurmadas ed il Cussegl ecumenic da baselgias.

§ 5 Esser baselgia ensemen

- ¹ La BERS e las baselgias commembras collavuran e sa sustegnan ina l'otra ad ademplir lur incumbensas.
- ² Ellas prendan resguard ed assistan ina l'otra.
- ³ La BERS integrescha las baselgias commembras en sias activitads.
- ⁴ La BERS e las baselgias commembras observan il princip da la subsidiaritat. Tenor quest princip surpiglia il nivel da la cuminanza da baselgias incumbensas be, sche quellas na pon betg vegnir evass sin il nivel da las baselgias commembras u da sias associaziuns.
- ⁵ Singulas baselgias commembras da la BERS pon surpigliar incumbensas che la BERS las deleghescha.

II. Incumbensas

§ 6 Incumbensas internas

- ¹ La BERS contribuescha a la solidaritad tranter las baselgias commembras.
- ² Ella contribuescha a las bunas relaziuns tranter las baselgias commembras cun dar intimaziuns per la vita ecclesiastica ed al adempliment da las incumbensas ecclesiasticas.
- ³ A favur da las baselgias commembras porscha ella lavur teologica ed etica fundamentala tar tematicas da baselgia, societad, politica, cultura, scienza ed economia, ed elavurescha posiziuns.
- ⁴ Ella promova la vita spirituala sin il nivel da la cuminanza da baselgias.

§ 7 Contacts externs

- ¹ La BERS mantegna las relaziuns ecumenicas sin il nivel naziunal ed internaziunal. Ella serva a l'unitad ecclesiastica en la varietad.
- ² Ella tgira il dialog gidieu-cristian ed il dialog interreligius sin il nivel naziunal ed internaziunal.
- ³ Ella tgira relaziuns cun las autoritads da la Confederaziun. Là represchenta ella ils interess da sias baselgias commembras.
- ⁴ Ella tgira relaziuns cun politica e societad civila sin il nivel naziunal ed internaziunal.
- ⁵ Las baselgias commembras èn responsablas per las relaziuns numnadas sin il nivel chantunal e communal.

§ 8 Ovras ecclesiasticas ed organisaziuns da la missiun

- ¹ La BERS s'engascha per sias ovras ecclesiasticas e las organisaziuns da missiun.
- ² L' «Agid da las Baselgias evangelicas svizras» e «Paun per tuts» èn fundaziuns da la BERS.
- ³ La BERS renconuscha «Mission 21» e «DM – échange et mission» sco sias ovras da missiun en Svizra.

III. Disposiziuns generalas

§ 9 Sez ed organs

- ¹ La BERS è ina associaziun tenor art. 60 ss. dal Cudesch civil svizzer (CCS) cun sez a Berna.
- ² Ses organs da dretg èn:
 - a. la sinoda;
 - b. il Cussegl;
 - c. il revisurat.

§ 10 Scumond da discriminaziun

En tut sias activitads en pled e fatg fa la BERS atenziun da betg discriminar insatgi.

§ 11 Eguatad

- ¹ La BERS promova l'egualitad tranter umens e dunnas.
- ² Ella promova ina represchentanza equilibrada dad umens e dunnas en ses gremis.

§ 12 Linguas

- ¹ La BERS fa atenziun che las linguas naziunalas sajan represchentadas equilibradamain en ses gremis.
- ² Ils documents da la BERS apparan en lingua tudestga e franzosa. Tenor basegn vegnan documents fundamentals translatads en lingua taliana e rumantscha.

IV. Commembranza

§ 13 Cumposiziun

Baselgias commembras da la BERS èn las baselgias evangelicas-refurmadas numnadas en l'aggiunta sco er ulteriuras baselgias protestantas da la Svizra.

§ 14 Admissiun

- ¹ La sinoda po admetter ina baselgia sco commembra sche quella
 - a. renconuscha questa constituziun inclus ses preambel;
 - b. è organisada sco corporaziun;
 - c. n'è betg integrada en ina baselgia commembra da la BERS u n'appartegna betg ad ina federaziun sinodala ch'è commembra da la BERS.
- ² L'admissiun d'ina baselgia sto vegnir acceptada da dus terzs dals commembers preschents da la sinoda.

§ 15 Sortida

- ¹ Cun respectar in termin da desditga da nov mais po mintga baselgia commembra sortir da la BERS sin la fin d'in onn.
- ² La brev da sortida èsi da drizzar a la sinoda.

§ 16 Exclusiun

- ¹ Ina baselgia commembra po vegnir esclusa, sch'ella cuntrafa ad interess fundamentals da la BERS.
- ² Sur da l'exclusiun decida la sinoda. La decisiun d'exclusiun sto vegnir acceptada da dus terzs dals commembers preschents da la sinoda.

V. Direcziun da la BERS

§ 17 Direcziun da la BERS sin trais nivels

- ¹ La BERS vegn manada sinodalmain, collegialmain e persunalmain tras la sinoda, il Cussegl e la presidenta u il president da la BERS.
- ² La sinoda, il Cussegl e la presidenta u il president da la BERS èn en tut lur far obligads a l'incumbensa da la BERS.
- ³ La sinoda, il Cussegl e la presidenta u il president da la BERS promovon la vita spirituala da la BERS.
- ⁴ Las decisiuns da la sinoda da la BERS èn impegnativas per las baselgias commembras. Ils reglaments valaivels da las singulas baselgias commembras restan resalvads.

A. Sinoda

§ 18 Principis

- ¹ La sinoda è l'organ superieur da la BERS.
- ² Il festivar cults divins e tgirar la cuminanza ha sia piazza adequata en la sinoda.
- ³ Sinodals novs vegnan installads en lur uffizi en in cult divin sinodal. Al cumenzament da lur emprima sinoda prestan els in' empermissiun d'uffizi.
- ⁴ En il rom da questa constituziun determinescha il reglament da la sinoda la maniera da sia lavur ed il proceder da ses gremis.

§ 19 Cumposiziun

- ¹ La sinoda sa cumpona dals sinodals che vegnan delegads da lur baselgias commembras per la perioda d'uffizi ch'ellas han defini.
- ² Il dumber da sinodals d'ina baselgia commembra dependa dal dumber da ses commembers a la fin da l'onn precedent da l'elecziun da renovaziun totala dal Cussegl:
 - a. fin 5000 commembers: ina sinodala u in sinodal;
 - b. fin 50000 commembers: dus sinodals;

Nova constituziun

c. per mintga ulteriurs 50 000 commembers cumenzads ina sinodala supplementara u in sinodal supplementar.

³ Collavuratur dal secretariat e da fundaziuns ch'èn organs da la sinoda u dal Cussegl, na pon betg esser sinodals.

§ 20 Presidi da la sinoda

¹ La sinoda elegia per scrutini or da ses ravugl in presidi che consista d'ina presidenta sinodala u d'in president sinodal e da duas vice-presidentas sinodals resp. dus vicepresidents sinodals. Quels han da vegnir or da differentas baselgias commembras.

² La presidenta sinodala u il president sinodal convochescha la sinoda e maina la radunanza.

§ 21 Cumpetenzas

La sinoda

- a. decida davart
 - il reglament per la sinoda,
 - il reglament da las finanzas,
 - ulteriurs reglaments, sche lur cuntegns na van betg en las cumpetenzas dal Cussegl;
- b. dat incumbensas al Cussegl ed evada incumbensas ch'il Cussegl la suttametta;
- c. formulescha intimaziuns per la vita ecclesiastica e l'adempliment da las incumbensas ecclesiasticas;
- d. determinescha ils champs d'activitad da la BERS;
- e. prenda cogniziun da las finamiras da la legislaziun dal Cussegl;
- f. elegia per scrutini il president u la presidenta da la BERS per in temp d'uffizi da quatter onns;
- g. elegia per scrutini ils ulteriurs commembers dal Cussegl per in temp d'uffizi da quatter onns;
- h. instituescha conferenzas;
- i. nominescha la cumissiun da gestiun sco er la cumissiun da nominaziun ed elegia lur commembers;
- j. nominescha ulteriuras cumissiuns ed elegia lur commembers;
- k. numna il revisurat;

Nova constituziun

l. approvescha il protocol da l'ultima sinoda;

m. approvescha il rapport annual dal Cussegl;

n. approvescha il rendaint e decida il preventiv;

o. dat descharscha al Cussegl;

p. decida davart la revisiun da la constituziun.

§ 22 Dretg da vuschar

¹ Mintga sinodala e mintga sinodal ha ina vusch.

² La sinoda è abla da decider, sche la maioritad dals sinodals è preschenta.

³ Tar votaziuns decida la maioritad simpla da las vuschs, sche questa constituziun u il reglament da la sinoda na prescrivan betg ina maioritad qualifitgada..

⁴ Ils commembers dal Cussegl han vusch consultativa en la sinoda.

§ 23 Cumissiun da gestiun

¹ La cumissiun da gestiun consista da tschintg sinodals, che han da vegnir or da differentas baselgias commembras.

² Ella predeliberescha las tractandas da la sinoda.

³ Ella examinescha il rapport annual, il preventiv ed il quint annual.

⁴ Ella examinescha l'administraziun dal Cussegl. Da tut temp po ella dumandar scleriment dal Cussegl.

§ 24 Cumissiun da nominaziun

¹ La cumissiun da nominaziun consista da trais sinodals, che han da vegnir or da differentas baselgias commembras.

² En collavuraziun cun las baselgias commembras e sunter consultaziun dal presidi da la sinoda prepara ella las nominaziuns per las elecziuns da la sinoda.

§ 25 Conferenzas

¹ La sinoda po instituir conferenzas per temp limità u per temp illimità.

² Ina conferenza è in lieu da la collavuraziun tranter la BERS, sias baselgias commembras ed ulteriuras ovras ed organizaziuns per ina tematica definida.

Nova constituziun

- ³ Las conferenzas han en la sinoda vusch consultativa ed il dretg da far propostas.
- ⁴ La sinoda determinescha en in reglament l'organisaziun ed il proceder da las conferenzas.

B. Cussegl

§ 26 Disposiziuns fundamentalas

- ¹ Il Cussegl è l'organ directiv ed executiv da la BERS.
- ² En in cult divin sinodal vegnan ils commembers dal Cussegl installads en lur uffizi tras il presidi sinodal. Al cumenzament da lur emprima sinoda prestan els in' empermissiun d'uffizi.
- ³ Il Cussegl determinescha en il rom da questa constituziun la maniera da lavur ed il proceder en il reglament.

§ 27 Cumposiziun

- ¹ Il Cussegl consista da set commembers incl. la presidenta u il president da la BERS.
- ² Ils commembers dal Cussegl èn duas giadas reelegibels.
- ³ Commembers che accumpleschan il 70 avel onn, sortan dal Cussegl sin la fin da quel onn da chalender.
- ⁴ En il Cussegl èn ordinads e na-ordinads, umens e dunnas sco er las regions linguisticas represchentads adequatamain.
- ⁵ Commembers dal Cussegl n'èn betg al medem mument commembers da la sinoda.
- ⁶ Il Cussegl numna dus vicepresidis e sa constituescha uschiglio sez en il rom da questa constituziun.

§ 28 Cumpetenzas

Il Cussegl

- a. determinescha las finamiras ed ils meds da si' activitad;
- b. fa propostas a la sinoda, executescha las decisiuns da la sinoda e maina ils affars current;
- c. represchenta la BERS sin il nivel naziunal ed internaziunal;

Nova constituziun

- d. deliberescha posiziuns publicas;
- e. è responsabel per la lavur en ils champs d'activitad fixads da la sinoda;
- f. nominescha cumissiuns strategicas e numna lur commembers.
Mintga cumissiun strategica vegn manada d'in commember dal Cussegl;
- g. nominescha cumissiuns permanentas u occasiunalas e reglescha lur maniera da lavur;
- h. elegia la direcziun dal secretariat e surveglia il secretariat;
- i. elavura rapports annuals, preventivs annuals e quints annuals.

§ 29 Decisiun

- ¹ Il Cussegl è abel da decider, sche la maioritad da ses commembers è preschenta.
- ² Mintga commember preschent da Cussegl è obligà da votar.

C. Presidenta u president da la BERS

§ 30 Disposiziuns fundamentalas

- ¹ La presidenta u il president da la BERS è commember dal Cussegl.
- ² Ella u el maina il Cussegl.

§ 31 Cumpetenzas

- ¹ La presidenta u il president da la BERS represchenta la BERS en il public.
- ² Ella u el promova la cuminanza tranter las baselgias commembras.
- ³ Ella u el formulescha intimaziuns per la vita ecclesiastica e l'ademplant da las incumbensas ecclesiasticas.

D. Gremis consultativs

§ 32 Cumissiuns strategicas

- ¹ Per mintga champ d'acziun fixà da la sinoda instituescha il Cussegl ina cumissiun strategica.

Nova constituziun

- ² En incumbensa dal Cussegl elavuran las cumissiuns strategicas programs e prestan lavur da colliaziun. Ellas cusseglian il Cussegl en dumondas fundamentalas dals champs d'acziun respectivs.
- ³ Per mintga cumissiun strategica dat il Cussegl in mandat e designescha el ils commembers.
- ⁴ Mintga cumissiun strategica vegn manada d'in commember dal Cussegl.

§ 33 Conferenza dals presidis da las baselgias

- ¹ Las presidentas ed ils presidents da las baselgias commembras furman la Conferenza dals presidis da las baselgias. En cas d'impediments pon els sa laschar remplazzar da lur vicepresidenta resp. vicepresidente.
- ² La presidenta u il president da la BERS moderescha la conferenza.
- ³ La conferenza promova la circulaziun da las infurmaziuns entaifer la BERS; tar basegn coordinescha ella activitads sin differents nivels ecclesiastics; ella discuta tematicas d'interess cuminaivels e deliberescha ulteriuras fatschentas che ses commembers u il Cussegl la suttamettan.
- ⁴ Al Cussegl po ella suttametter tematicas a la consultaziun.

E. Secretariat

§ 34 Status ed organizaziun

- ¹ Il secretariat sustegna la sinoda, il Cussegl e la presidenta u il president da la BERS cun ademplir lur incumbensas.
- ² Il Cussegl fixescha l'organizaziun e las incumbensas dal secretariat en in reglament.

F. Revisurat

§ 35 Incumbensa

- ¹ Il revisurat examinescha la contabilitad ed il quint annual da la BERS sch'els correspundan a las prescripziuns legalas.
- ² Ses rapport vegn preschentà a la sinoda.

Nova constituziun

VI. Associaziun

§ 36 Baselgias e cuminanze asociadas

- ¹ L'associaziun dat a baselgias e cuminanze che n'èn betg commembras da la BERS la pussibilità d'in inscunter instituziunalisà e d'in barat structurà cun la BERS. Baselgias e cuminanze asociadas n'èn betg commembras en il senn da IV. (Commembranza).
- ² Associà pon vegnir
 - a. baselgias e cuminanze evangelicas domiciliadas en Svizra che
 1. s'enclegian sco baselgia e cuminanza entaifer la tradiziun evangelica,
 2. èn derasadas silmain regiunalmain,
 3. èn constituidas democraticamain,
 4. n'èn betg integradas en ina baselgia commembra da la BERS u n'appartegnan betg ad ina federaziun sinodala ch'è commembra da la BERS;
 - b. baselgias e cuminanze evangelicas svizras a l'ester.
- ³ L'associaziun sto vegnir acceptà da dus terzs dals sinodals preschents.
- ⁴ Baselgias e cuminanze asociadas delegheschan ina represchentanta u in represchentant en la sinoda. En la sinoda han ellas vusch consultativa.
- ⁵ Il Cussegl maina cun las baselgias e cuminanze asociadas in barat structurà.
- ⁶ Cun respectar in termin da desditga da trais mais pon baselgias e cuminanze asociadas sortir da la BERS sin la fin d'in onn. La finiziun d'ina associaziun sto vegnir acceptada da dus terzs dals commembers preschents da la sinoda.

VII. Finanzas

§ 37 Princip

La BERS cuvra sias expensas tras

- a. contribuziuns da las commembras,
- b. contribuziuns extraordinarias,
- c. retgavs da la facultad,
- d. ulteriuras contribuziuns.

§ 38 Contribuziuns da las commembras

- ¹ Las baselgias commembras pajan mintg'onn contribuziuns per cuvrir las expensas tenor il preventiv. Il Cussegl fixescha il termin dal pajament.
- ² Il reglament da finanzas fixescha la clav da repartiziun per las contribuziuns da las baselgias commembras.
- ³ A favur da singulas baselgias commembras deblas da finanzas pon ins prevesair in levgiament.
- ⁴ Il dretg da vuschar dals sinodals d'ina baselgia commembra vegn sisti, sche la baselgia commembra n'ha betg pajà sia contribuziun en fin al termin fixà dal Cussegl.

§ 39 Contribuziuns extraordinarias

La sinoda decida davart contribuziuns extraordinarias e sia repartiziun sin las baselgias commembras.

VIII. Revisiun da la constituziun

§ 40 Proceder

- ¹ Propostas per midar la constituziun ston vegnir tractandadas duas giadas da la sinoda. La segunda lectura po avair lieu il pli baud en la proxima radunanza da la sinoda.

- ² Ina midada da la constituziun dovra en la votaziun finala l'acconsentiment da dus terzs da las vuschs entradas.
- ³ Sche noziuns da la constituziun midan, po il presidi da la sinoda sin dumonda dal Cussegl far quellas midadas ed inserir quellas novas noziuns en la constituziun.

§ 41 Schliaziun

- ¹ La sinoda decida davart la schliaziun da la BERS.
- ² La schliaziun dovra l'acconsentiment da dus terzs dals commembers preschents da la sinoda.
- ³ En il cas da la schliaziun da la BERS van gudogn e chapital ad ina eventuala organisaziun successura da la BERS, e sch'i na dat nagina tala tenor la clav da repartiziun valabla a las baselgias commembras.

IX. Disposiziuns finalas

§ 42 Entrada en vigor

- ¹ Questa constituziun remplazza quella dals 13 da zercladur 1950.
- ² Ella entra en vigor ils 1. da schaner 2020.


§ 43 Disposiziuns transitoricas e finalas

- ¹ La durada d'uffizi dals elegids en fin a l'entrada en vigor da la constituziun revedida correspunda e finescha tenor il dretg vegl. Da l'emprima reelecziun davent valan las disposiziuns da la nova constituziun.
- ² Las incompatibilitads valan per tut las elecziuns dapi l'entrada en vigor da la constituziun revedida.
- ³ En fin a l'entrada en vigor d'ordinaziuns, reglaments etc. che han da vegnir revedidas resp. elavuradas, vegn applitgà il dretg d' en fin ussa.
- ⁴ En cas da dubi decretescha il presidi da la sinoda en cunvegnientscha cun il Cussegl las ordinaziuns necessarias.

Agiunta

Las baselgias commembras da la BERS

Evangelisch-Reformierte Landeskirche des Kantons Aargau
Evangelisch-reformierte Landeskirche beider Appenzell
Evangelisch-reformierte Kirche des Kantons Basel-Landschaft
Evangelisch-reformierte Kirche des Kantons Basel-Stadt
Evangelisch-reformierter Synodalverband Bern-Jura
Église évangélique réformée du canton de Fribourg
Église protestante de Genève
Evangelisch-Reformierte Landeskirche des Kantons Glarus
Baselgia evangelica refurmada dal Grischun
Evangelisch-Reformierte Landeskirche des Kantons Luzern
Église réformée évangélique du canton de Neuchâtel
Evangelisch-Reformierte Kirche Nidwalden
Verband der evangelisch-reformierten Kirchgemeinden
des Kantons Obwalden
Evangelisch-reformierte Kirche des Kantons Schaffhausen
Evangelisch-reformierte Kantonalkirche Schwyz
Evangelisch-Reformierte Kirche Kanton Solothurn
Evangelisch-reformierte Kirche des Kantons St. Gallen
Evangelische Landeskirche des Kantons Thurgau
Chiesa evangelica riformata nel Ticino
Evangelisch-Reformierte Landeskirche Uri
Église évangélique réformée du Canton de Vaud
Église réformée évangélique du Valais
Evangelisch-reformierte Kirchgemeinde des Kantons Zug
Evangelisch-reformierte Landeskirche des Kantons Zürich
Evangelisch-methodistische Kirche in der Schweiz



Baselgia evangelica reformada da la Svizra BERS
Sulgenauweg 26, Chascha postala, 3001 Berna, Svizra
www.evref.ch